

Na osnovu tačke IV. Odluke o usvajanju Programa utroška sredstava kapitalnih transfera u okviru programa - podrška sektoru male privrede u cilju jačanja konkurentnosti – sa ekonomskog koda 615100 - Kapitalni transferi drugim nivoima vlasti i fondovima, utvrđenih Budžetom Federacije Bosne i Hercegovine za 2026. godinu Federalnom ministarstvu razvoja, poduzetništva i obrta, na osnovu tačke IV. Odluke o usvajanju Programa utroška sredstava tekućih transfera u okviru programa - podrška sektoru male privrede u cilju jačanja konkurentnosti – sa ekonomskog koda 614300 - Tekući transferi neprofitnim organizacijama, utvrđenih Budžetom Federacije Bosne i Hercegovine za 2026. godinu Federalnom ministarstvu razvoja, poduzetništva i obrta, kao i na osnovu tačke IV. Odluke o usvajanju Programa utroška sredstava tekućih transfera u okviru programa - podrška sektoru male privrede u cilju jačanja konkurentnosti – sa ekonomskog koda 614500 - Subvencije privatnim preduzećima i poduzetnicima, utvrđenih Budžetom Federacije Bosne i Hercegovine za 2026. godinu Federalnom ministarstvu razvoja, poduzetništva i obrta („Službene novine Federacije BiH“, broj: 11/26), člana 5. Pravilnika o postupcima u provođenju Programa poticaja za razvoj poduzetničke infrastrukture u Federaciji Bosne i Hercegovine („Službene novine Federacije BiH“, broj: 104/24), i člana 5. Pravilnika o postupcima u provođenju Programa poticaja za razvoj male privrede u Federaciji Bosne i Hercegovine („Službene novine Federacije BiH“, broj: 104/24), Federalno ministarstvo razvoja, poduzetništva i obrta raspisuje

JAVNI KONKURS ZA ODABIR KORISNIKA GRANT SREDSTAVA KAPITALNIH I TEKUĆIH TRANSFERA ZA 2026. GODINU

I. PREDMET JAVNOG KONKURSA

Predmet Javnog konkursa je prikupljanje projektnih prijava za odabir korisnika grant sredstava Kapitalnih i Tekućih transfera, utvrđenih u razdjelu 50., glava 5001, Budžeta Federacije Bosne i Hercegovine za 2026. godinu Federalnom ministarstvu razvoja, poduzetništva i obrta (u daljem tekstu: Ministarstvo) („Službene novine Federacije BiH“, broj: 6/26).

II. NAZIVI PROJEKATA, SVRHA, KRITERIJI I KORISNICI SREDSTAVA

Grant sredstva će se dodjeljivati po sljedećim projektima:

PROJEKAT BR. 1: Izgradnja poduzetničkih zona

Ukupna vrijednost raspoloživih sredstava za ovaj projekat je 5.000.000,00 KM.

Svrha projekta

Izgradnja nove i unapređenje postojeće energetske, komunalne, saobraćajne i komunikacijske infrastrukture, tamo gdje nedostatak iste predstavlja prepreku razvoju poduzetništva u poduzetničkim zonama Federacije Bosne i Hercegovine, kao i uspostava/unapređenje usluga za razvoj poduzetništva unutar poduzetničke zone kao faktora za ekonomski rast na lokalnom nivou.

Kriteriji za raspodjelu sredstava

Kvalitet projekta, iznos sufinansiranja, nivo razvijenosti zone, ravnomjerniji regionalni razvoj (stepen razvijenosti JLS), namjena ulaganja sredstava, poticaji od Ministarstva u zadnjih pet (5) godina.

Bodovanje po kriterijima je detaljnije navedeno u Smjernicama za podnosiocje projektnih prijava koje su sastavni dio aplikacionog paketa i biti će objavljene uz Javni konkurs.

Kategorija korisnika sredstava

Općine i gradovi u Federaciji Bosne i Hercegovine.

PROJEKAT BR. 2: Unapređenje institucijske poduzetničke infrastrukture

Ukupna vrijednost raspoloživih sredstava za ovaj projekat je 400.000,00 KM.

Svrha projekta

Na osnovu identifikovanih potreba, jedna od ključnih projektnih aktivnosti fokusirana je na razvoj poduzetništva kroz, između ostalog, unapređenje i jačanje sistema poslovne podrške u Federaciji Bosni i Hercegovini.

Cilj jeste unaprijediti razvoj poduzetničkih potpornih institucija i tehnološko-poduzetničkih centara opisanih Zakonom o poduzetničkoj infrastrukturi u Federaciji Bosne i Hercegovine (Službene novine Federacije BiH, broj: 41/24), kao i potaknuti kvalifikovane pružaoce usluga poslovne podrške na teritoriji Federacije BiH za uspostavljanje novih i/ili unapređenje postojećih linija poslovne podrške.

Kriteriji za raspodjelu sredstava

Kvalitet projekta, iznos sufinansiranja, broj zaposlenih, ravnomjerniji regionalni razvoj (stepen razvijenosti JLS), poticaji od Ministarstva u posljednjih 5 godina.

Bodovanje po kriterijima je detaljnije navedeno u Smjernicama za podnosiocje projektnih prijava koje su sastavni dio aplikacionog paketa i biti će objavljene uz Javni konkurs.

Kategorija korisnika sredstava

Korisnici sredstava mogu biti poduzetničke potporne institucije i tehnološko-poduzetnički centri opisani Zakonom o poduzetničkoj infrastrukturi u Federaciji Bosne i Hercegovine (Službene novine Federacije BiH, broj: 41/24), s područja Federacije BiH koji su registrovani najkasnije do 31.12.2024. godine i imaju minimalno tri (3) stalno zaposlenih radnika.

PROJEKAT BR. 3: Jačanje konkurentnosti MSP

Ukupna vrijednost raspoloživih sredstava za ovaj projekat je 20.000.000,00 KM

Svrha projekta

Jačanje konkurentnosti i poticanje rasta inovativnih i izvozu usmjerenih MSP-a kroz tehnološku modernizaciju poslovnih procesa, proširenje kapaciteta proizvodnje, uvođenje standarda kvalitete, cirkularne ekonomije i poboljšanje energijske efikasnosti u skladu s tranzicijom ka zelenoj i digitalnoj ekonomiji.

Kriteriji za raspodjelu sredstava

Kvalitet projekta, iznos sufinansiranja, pripadnost ciljnoj skupini, ravnomjerniji regionalni razvoj (stepen razvijenosti JLS), poticaji od Ministarstva u posljednjih pet (5) godina, vrsta djelatnosti s aspekta stepena finalizacije proizvoda, namjena ulaganja sredstava.

Bodovanje po kriterijima je detaljnije navedeno u Smjernicama za podnosiocje projektnih prijava koje su sastavni dio aplikacionog paketa i biti će objavljene uz Javni konkurs.

Kategorija korisnika sredstava

Subjekti male privrede definisani po Zakonu o poticanju razvoja male privrede i registrovani po Zakonu o privrednim društvima Federacije Bosne i Hercegovine, koji imaju sjedište na području Federacije Bosne i Hercegovine, registrovani najkasnije do 31.12.2024. godine, koji su u sistemu PDV-a, imaju iskazano pozitivno poslovanje u 2025. godini, imaju najmanje 5 (pet) zaposlenih na neodređeno vrijeme, te će povećati zaposlenost minimalno za jednog radnika tokom realizacije projekata i čija je osnovna djelatnost (ili djelatnost poslovnih jedinica ukoliko subjekt aplicira sa poslovnom jedinicom) iz Klasifikacije djelatnosti Bosne i Hercegovine – KD BiH 2010 („Službeni glasnik BiH", broj: 47/10):

- „područje C – Prerađivačka industrija“ osim djelatnosti proizvodnje žestokih alkoholnih pića, duhanskih proizvoda i namjenske proizvodnje.
Dodatno nisu prihvatljive šifre osnovne djelatnosti unutar oblasti 18, šifre osnovne djelatnosti unutar grane 23.5, kao ni šifre osnovne djelatnosti definisane razredima 10.71; 16.10; 23.63 i 23.70.

Osnovna djelatnost subjekta male privrede (ili djelatnost poslovnih jedinica ukoliko subjekt aplicira sa poslovnom jedinicom) će se dokazivati sa dokumentom - Obavijest o razvrstavanju subjekta prema klasifikaciji djelatnosti (KD BiH 2010) koga izdaje Zavod za statistiku Federacije BiH.

PROJEKAT BR. 4: Poticaj za razvoj obrta i srodnih djelatnosti

Ukupna vrijednost raspoloživih sredstava za ovaj projekat je 1.000.000,00 KM.

Svrha projekta

Poticanje razvoja obrta i srodnih djelatnosti kroz sufinansiranje troškova nabavke opreme potrebne za proširenje i osavremenjivanje poslovanja s ciljem unapređenja obrtništva odnosno povećanja kvaliteta proizvoda i rasta zaposlenosti.

Kriteriji za raspodjelu sredstava

Iznos sufinansiranja, namjena ulaganja sredstava, pripadnost ciljnoj skupini, ravnomjerniji regionalni razvoj (stepen razvijenosti JLS), poticaji Ministarstva u posljednjih pet (5) godina. Bodovanje po kriterijima je detaljnije navedeno u Smjernicama za podnosiocje projektnih prijava koje su sastavni dio aplikacionog paketa i biti će objavljene uz Javni konkurs.

Kategorija korisnika sredstava

Obrtnici koji su registrovani u skladu sa Zakonom o obrtu i srodnim djelatnostima u Federaciji Bosne i Hercegovine iz sljedećih područja Klasifikacije djelatnosti Bosne i Hercegovine – KD BiH 2010:

- „Područje C – Prerađivačka industrija“ (Osim C-10; C-23; C-25 i C-32; i djelatnosti proizvodnje žestokih alkoholnih pića, duhanskih proizvoda i namjenske proizvodnje)
- „Područje F – Građevinarstvo“ i
- „Područje J, oblast 62 – Računarsko programiranje, savjetovanje i djelatnosti povezane sa njima“.

Svi korisnici sredstava moraju imati sjedište na području Federacije Bosne i Hercegovine, registrovani najkasnije do 31.12.2024. godine, te imati najmanje 1 (jednog) zaposlenog na neodređeno vrijeme. Korisnici poticajnih grant sredstava Ministarstva u 2025. godini ne mogu koristiti sredstva ovog projekta.

PROJEKAT BR. 5: Poticaj novoosnovanim subjektima male privrede

Ukupna vrijednost raspoloživih sredstava za ovaj projekat je 1.000.000,00 KM.

Svrha projekta

Održavanje pozitivnog trenda poduzetničke aktivnosti s aspekta povećanja broja novoosnovanih subjekata male privrede. Kroz projekt će se realizovati subvencioniranje troškova nabavke opreme potrebne za proširenje i osavremenjivanje poslovanja, kao i pružanje mentoring usluga s ciljem povećanja kvaliteta proizvoda i rasta zaposlenosti.

Kriteriji za raspodjelu sredstava

Iznos sufinansiranja, vrsta djelatnosti, broj zaposlenih, pripadnost ciljnoj skupini, ravnomjerniji regionalni razvoj (stepen razvijenosti JLS).

Bodovanje po kriterijima je detaljnije navedeno u Smjernicama za podnosioc projektnih prijava koje su sastavni dio aplikacionog paketa i biti će objavljene uz Javni konkurs.

Kategorija korisnika sredstava

Subjekti male privrede definisani po Zakonu o poticanju razvoja male privrede i registrovani po Zakonu o privrednim društvima i Zakonu o obrtu i srodnim djelatnostima, koji imaju sjedište na području Federacije Bosne i Hercegovine, te imaju najmanje 1 (jednog) zaposlenog na neodređeno vrijeme, a registrovani su poslije **21.03.2025. godine**.

Nisu prihvatljive projektne prijave subjekata male privrede koji imaju registrovanu osnovnu djelatnost u oblasti namjenske industrije, proizvodnje žestokih alkoholnih pića, proizvodnje i prerade duhana, djelatnosti iz oblasti trgovine na malo i veliko, ugostiteljstva, turizma, poljoprivrede i igara na sreću.

Osnovna djelatnost subjekta male privrede će se dokazivati sa dokumentom-Obavijest o razvrstavanju subjekta prema klasifikaciji djelatnosti (KD BiH 2010) koga izdaje Zavod za statistiku Federacije BiH.

III. PRAVO SUDJELOVANJA

Korisnici poticajnih sredstava koji do krajnjeg roka za podnošenje projektnih prijava ovog Javnog konkursa nisu izvršili svoje ranije preuzete obaveze po osnovu korištenja poticajnih sredstava Ministarstva, nemaju pravo učešća na ovom Javnom konkursu odnosno njihove projektne prijave se neće uzeti u razmatranje.

Podnosioci projektnih prijava mogu podnijeti projektnu prijavu samo po jednom projektu iz ovog javnog konkursa. U slučaju više projektnih prijava istog podnosioca po istom ili različitim projektima sve projektne prijave će biti odbačene i neće biti predmet daljeg razmatranja.

Korisnici sredstava po „Uredbi o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja postojećih radnih mjesta za 2025. godinu“, imaju pravo aplicirati za dodjelu sredstava po ovom Javnom konkursu.

IV. SADRŽAJ PROJEKTNE PRIJAVE ZA SUDJELOVANJE U JAVNOM KONKURSU

Podnosioci projektne prijava pripremaju projektne prijave u skladu sa Smjernicama za podnosioc projektnih prijava, koje se kao i sva ostala potrebna dokumentacija mogu preuzeti na online platformi <https://javnipozivi.fmrpo.gov.ba>, kao i na internet stranici Ministarstva www.fmrpo.gov.ba

V. EVALUACIJA I ODABIR KORISNIKA

Evaluacija i odabir korisnika će se vršiti u skladu sa kriterijima i procedurom utvrđenim Smjernicama za podnosiocima projektnih prijava.

Nakon obrade prispjelih projektnih prijava Ministarstvo će objaviti rezultate Javnog konkursa na internet stranici Ministarstva.

VI. NAČIN PODNOŠENJA PROJEKTNE PRIJAVE

Svu neophodnu dokumentaciju navedenu u Smjernicama za podnosiocima projektnih prijava potrebno je dostaviti putem online platforme <https://javnipozivi.fmrpo.gov.ba>.

Projektne prijave podnesene putem pošte neće se uzeti u razmatranje.

Krajnji rok za podnošenje projektnih prijedloga za navedene projekte je **11.03.2026. godine (srijeda), do 17:00**. Nakon isteka predviđenog roka, sistem će automatski blokirati mogućnost podnošenja projektne prijave, pa se sugeriše potencijalnim korisnicima da u predviđenom roku podnesu projektну prijavu.

Projektne prijave će biti odbačene i neće biti predmet daljeg razmatranja ako:

- nemaju sve sadržajne elemente,
- ne ispunjavaju uslove ovog javnog konkursa.

U postupku ovog javnog konkursa Ministarstvo ne snosi nikakve troškove sudionicima u konkursu, te zadržava pravo da u slučaju opravdanosti poništi ovaj javni konkurs. Prispjela dokumentacija se neće vraćati.

VII. OSTALE ODREDBE

Sa podnosiocima prihvaćenih projektnih prijava Ministarstvo zaključuje ugovore, kojima će se definisati međusobna prava i obaveze ugovornih strana, a posebno način i dinamika korištenja dodijeljenih finansijskih sredstava, te nadzor nad utroškom istih.

Podnosioci projektnih prijava čije se projektne prijave odbace, mogu uložiti prigovor Ministarstvu u roku od osam dana od dana objave potencijalne rang liste na web stranici Ministarstva, radi provjere činjenica i objektivnosti ocjene projektne prijave.

Sva dodatna pitanja u vezi ovog Javnog konkursa se mogu dostaviti putem online platforme <https://javnipozivi.fmrpo.gov.ba>, kako je definisano Smjernicama za podnosiocima projektnih prijava. Odgovori na postavljena pitanja će biti objavljeni i redovno ažurirani na navedenoj platformi.